

Das Erste Buch

Oder Koche in der Laug/ die mittelrinde von den Oliven, Weidenlaub/ Capillum Veneris, vnd Rohrwurzel/ vnd wasche damit das Haupt.

Das V. Capitel.

Dieweil ich izunder geschrieben/ wie man die Haar auff allerley Farben färbet/ dieselbigen wachsen vnd krauß machen solt:
Als wil ich dargegen etliche Kunststücke anhero setzen/ wie man dieselbe vertreiben sol.

Haar außsetzen/ oder machen außzufallen/ an welchem ohrt des Leibs du wilt.

Nim Bergkroht/ Sandaracha genant/ 4. Loht/ vngeleschten Kalck anderthalb q. mische es vntereinander/ koche es mit Wasser/ vnd wenn es anhebt zu sieden/ so nim es darnach vnd salbe den Ohrt damit/ da du wilt kein Haar haben: Wiltu aber wissen/ ob es genug gesotten sey/ so nim eine Feder/ vnd stosse sie darcin/ vnd wenn die Haar daran abfallen/ so ist es kräftig genug. Du solst auch die Salben gebrauchen/ wenn du wilt ins Bad gehen/ vnd wenn du ansehst zu schwitzen/ so wische den Schweiß abe/ vnd schmiere dich/ vnd wenn die Haar außfallen/ so wasche den Leib widerumb.

Eine Salbe das Haar außfallen zu machen/ an welchem ohrt man wil.

Nim geklopffte frische Eyerklar/ vngeleschten Kalck 16. Loht/ Auripigmentum 2. Loht/ stoß zu Pulver/ was zu stossen ist/ vnd mische es durch einander/ thue so viel Laugen darzu/ daß es gleich einer Salben wird/ salbe als denn die haarechten Glieder damit/ mit einer Federn/ vnd wenn die Salbe einer viertel Stunden lang außgeblieben/ so wasche es wieder mit warmen Wasser abe/ so fallen die Haar auß. Wollen sie aber nicht außfallen/ so schmiere den ort noch einmal mit der Salben/ vnd wasche es bald mit warmen Wasser wider